



# mjesečni Bilten

omladinska mreža bosne i hercegovine

juni  
lipanj  
2016.

205

## Dragi prijatelji/ce,

Predstavljamo vam junsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **181** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.omladina-bih.net](http://www.omladina-bih.net)



### SADRŽAJ

Aktivnosti u junu 2016. ....	2
Planovi za juli 2016. ....	6
Aktivnosti članova mreže .....	7
Saopštenja/informacije/donatori/pozivi.....	23

Uživajte u čitanju!

# AKTIVNOSTI ORC/HCA U JUNU 2016.



## DIVIDED PAST JOINT FUTURE

### Partnerski projekat – „Divided past – joint future“

Omladinski resursni centar Tuzla sprovodi istraživanje percepcije i ponašanja različitih aktera u procesu izgradnje mira i pomirenja na Zapadnom Balkanu kao dio IPA projekta „Podijeljena prošlost - zajednička budućnost“. Svrha ovog projekta je izgradnja infrastrukture za efektivan proces pomirenja na Zapadnom Balkanu i Turskoj. Istraživački dio projekta zahtijeva sudjelovanje predstavnika privatnog sektora, sektora civilnog društva, javnog sektora i građana, u nizu fokus grupa u kojima mogu ponuditi svoja stajališta, iskustva i mišljenja o procesu pomirenja u (Bosni i Hercegovini) kao i u regiji.

U okviru ovoga smo tokom juna završili sa organizovanjem fokus grupa: 3 u Brčko distriktu BiH i 4 u Sarajevu, kako bi razgovarali o različitim problemima koji se odnose na proces pomirenja – od samog značenja pomirenja za društvo, potom ocjene uloge različitih društvenih sektora u tom procesu, do načina na koje proces pomirenja može biti osnažen. Fokus grupe su organizovane u Brčko Distriktu BiH i Sarajevu.

Više informacija o aktivnostima u narednom periodu na našoj web stranici: [www.omladina-bih.net](http://www.omladina-bih.net), te u biltenima i na mejling listama.

### Konferencija „Civilno društvo za odgovornu vlast“ Sarajevo

Konferencija pod nazivom "Civilno društvo za odgovornu vlast" održana je u Sarajevu, 28. juna 2016. godine, u organizaciji *Southeast Europe Leadership for Development and Integrity* (SELDI), a u saradnji sa *Centrom za istraživačko novinarstvo* (CIN) i lokalnim partnerskim organizacijama, uz podršku *DG NEAR* i *Civil Society Facility* (CSF) i *Europske Unije* (EU).

Na konferenciji je učestvovalo oko tridesetak učesnika, među kojima su bili i predstavnici ORC Tuzla *Damir Krnjić* i *Slobodan Blagovčanin*.

Na konferenciji je predstavljeno sveobuhvatno istraživanje o stavovima građana i njihovom pogledu na korupcije, koje je provedeno u 8 zemalja Zapadnog Balkana i Turske. Istraživanje je pokazalo



poražavajući položaj naše države, gdje su u većini istraživanja lošiji položaj od *Bosne i Hercegovine* zauzimale samo *Albanija* i *Makedonija*.

Takođe su održane dvije panel diskusije na kojima su učešće uzeli: *Sead Lisak*, direktor Agencije za prevenciju korupcije i koordinaciju borbe protiv korupcije; *Eldin Karić*, direktor ACCOUNT; *Prof. Mladen Miroslavić*, Banja Luka College; *Aleksandra Martinović*, potpredsjednica Odbora direktora Transparency International BiH; *Prof. Nerzuk Ćurak*, Fakultet političkih nauka; *Zoran Ivančić*, direktor Centra za zastupanje građanskih interesa CPI; *Garret Tankosić-Kelly*, SEE Changhe Net; *Leila Bičakčić*, direktorica CIN; *Mervan Miraščija*, Programski menadžer Fond Otvoreno društvo BiH, *Jasna Panjeta*, Programski menadžer, Regionalna antikorupcijska inicijativa RAI.

Zaključeno je kako je uloga institucija, civilnog društva i medija u borbi protiv korupcije neodvojiva od same percepcije građana korupcije i njihovog pristupa istoj. Bez zajedničke multidisciplinarnе borbe koja je kontinuirani i dugotrajni proces nema uspjeha.

## Omladinska grupa ORC Tuzla

### Građanska matura

Fondacija CPI, u saradnji sa Omladinskim resursnim centrom Tuzla, organizovala je 7. juna 2016. godine edukativno zabavni događaj "**Građanska matura**" u Narodnom pozorištu Tuzla, sa potpuno besplatnim ulazom.

Za vrhunski provod i odličnu zabavu pobrinula se ekipa iz grupe "*Komedija sa nogu*" na čelu sa *Peđom Bajovićem*, i naročito interesantnim *Hazimom Mujčinovićem* i *Filipom Andronikom*. Ovaj trojac je na izuzetno interesantan način sa preko 200 mladih razgovarao o politici, položaju mladih, i o načinu kako da polože "Građansku maturu" sa najvišom ocjenom!



Skupovi koji su prvenstveno namjenjeni mladima između 16 i 30 godina održavaju se u 6 bosansko-hercegovačkih gradova. Uvjedljivo najveći odziv mladih, te njihov interes za promjene u gradu i polaganje najvažnije mature bio je u Tuzli.

Organizatori "Građanske mature" u gradu Tuzla nisu krili oduševljenje. Smatraju da su mladi u Tuzli još jednom pokazali da im je stalo do njihovog položaja u gradu, te da mladima treba pružiti šansu i mogućnost da se okupe i kroz slične "coolturne" manifestacije razgovaraju o gorućim problemima za njih.

Tokom manifestacije prezentovana je i brošura "**Priručnik za građansku maturu**" *Dr. Velme Pijalović* sa Ekonomskog fakulteta Univerziteta u Sarajevu. Brošura je osmišljena i prilagođena mladima u svrhu informisanja prije izlaska na izbore.

Građanska matura je organizovana u okviru projekta "*Od budžetske otvorenosti i dostupnosti do participativnosti*", finasiranog od strane *Fonda Otvoreno društvo Bosne Hercegovine*.

## Uči – misli i djeluj – KULT

Jednogodišnji program obuke mladih lidera/ki UmiD (Uči, Misli i Djeluj), koji realizira Institut za razvoj mladih KULT, ove godine krenuo je sa obukom desete generacije. Obuka će se održavati u periodu od juna do decembra 2016., i sastoji se od 8 modula, tj. dvodnevnih radionica i ljetne škole.

Teme koje će se obrađivati su sljedeće: građanski aktivizam i volonterstvo, demokratski principi i Evropska unija, ljudska prava, pisanje projekata, timski rad i liderstvo, namicanje sredstava, javno zagovaranje, mirno rješavanje konflikata i saradnja s privrednim sektorom.

Prvi modul, čija je tema bila građanski aktivizam i volonterstvo, održan je od 02. do 04.06. 2016 u Sarajevu. Pored teorijskog dijela, mladi su imali i priliku aktivno učestvovati, te kroz terenske aktivnosti bolje spoznati ciljeve i motive volontiranja i aktivizma. U obuci učestvuje 24 polaznika/ca iz oba entiteta.

Predstavnici Omladinske grupe Omladinskog Resursnog centra su *Jasmina Begović* i *Husein Šljivić*.



## Zabava Omladinske grupe ORC Tuzla

Omladinska grupa Omladinskog resursnog centra osnovana je u oktobru 2013. godine, i na početku je brojala svega 15 člana. Uz kontinuiran rad i zalaganje za bolju budućnost mladih, danas ova grupa broji oko 40 članova i za sobom ima brojna dostignuća u polju aktivizma i volonterizma mladih.

Samo od prošle godine, Omladinska grupa ORC-a Tuzla organizovala je veliki broj događaja za mlade. Između ostalog izdvajamo: Youth Event: Uvijek postoji izbor – građanska hrabrost u vrijeme rata i mira, Živi zdrav život vol. 2, Turnir u futsalu pod nazivom „Fudbal za sve“, Turnir u fudbalu na pijesku pod nazivom „Fudbal bez predrasuda“, Građanska matura – Stand up komedija u Narodnom pozorištu Tuzla.

Pored toga, Omladinska grupa učestvovala je u realizaciji događaja poput „Eko Psihijatrija“, a naši mladi imali su priliku i učestvovati u akciji sađenja drveća za aktivistkinju *Angelinu Hodžić*.

Mladi su svjesni značaja koji donosi neformalno obrazovanje, te stoga često posjećuju razne seminare i treninge, te pokušavaju ohrabriti nove generacije da se aktivno uključe u pozitivne društvene promjene.

Kao nagrada za uspješnu godinu, Omladinska grupa ORC Tuzla je održala zabavu za sve članove Omladinske grupe, simpatizere, saradnike, medije i donatore. Zabava je održana 30. juna u prostorijama ORC Tuzla.



Da napomenemo, sve aktivnosti Omladinske grupe ORC-a Tuzla možete pratiti putem mjesečnog informativnog Biltena Omladinskog resursnog centra Tuzla i Omladinske mreže Bosne i Hercegovine na njihovoj zvaničnoj stranici.

Za sve ostale mlade koji imaju želju da se aktivno uključe u Omladinsku grupu ORC-a, koji žele da prošire svoje znanje, upoznaju nove ljude te doprinesu svojoj zajednici, Omladinska grupa raspisuje konkurs za prijavu novih članova. Prijave se mogu izvršiti na sljedećem linku:

<https://docs.google.com/forms/d/1QI0POChUkun6JCKpejVxwxV16bQPXvaDJrrfOLghzgw/viewform?c=0&w=1>

## PREDSTAVLJAMO MLADE!

### Zamire Sokoli



*Zamire Sokoli je jedna od prvih članica naše Omladinske grupe. Trenutno završava Tehnološki fakultet na Univerzitetu u Tuzli. Zamire je prošla veliki broj seminara, koje je organizovao Omladinski resursni centar.*

*Zamire smatra da je na njen lični razvoj veliki uticaj i značaj imala Omladinska grupa. Hobi naše članice jeste uređenje enterijera za proslave i aranžiranje cvijeća.*

### Eldar Imamović



*Eldar Imamović ima 19 godina i student je prve godine Fakulteta Elektrotehnike u Tuzli. Pored fakulteta bavi se Fotografijom i Video produkcijom. Duži niz godina aktivno učestvuje u radu nekoliko nevladinih organizacija/grupa. Član je Omladinske grupe Omladinskog resurnog centra 3 godine. Kroz rad u nevladinim organizacijama je imao priliku da učestvuje na velikom broju seminara i edukacija te na taj način znatno proširi svoje znanje u oblasti NGO aktivizma.*



## NAJAVA AKTIVNOSTI OMLADINSKE GRUPE ORC ZA JULI

### „NEDOVOLJAN 1“

Projekat „Nedovoljan 1“ će implementirati Omladinska grupa Omladinskog resursnog centra (OGORC). Cilj projekta je edukacija mladih o prevenciji maloljetničke delinkvencije, gdje će se između ostalog obrađivati teme poput: predrasuda i stereotipa, delinkvencija i nenasilna komunikacija, volonterizam i slično.

Projekat će se implementirati u Kući plamena mira u Tuzli, i obuhvatiće u najvećoj mjeri srednjoškolsku populaciju, kojoj je i namjenjen. Planirano je kroz radionice educirati 90 učesnika, koji će po završetku projekta dobiti certifikate o temama koje smo zajedno prošli.

Pored direktnih korisnika, indirektno ćemo, putem interneta, uključiti i roditelje u projekat, jer vjerujemo da i oni mogu biti ključni u prevenciji maloljetničke delinkvencije. Ovaj projekat će koristiti, prije svega direktnim učenicima projekta, jer će naučiti prepoznati oblike maloljetničke delinkvencije i biti sposobni da djeluju kao mladi lideri na svoje vršnjake, te pozitivnim primjerima doprinijeti razrješavanju konfliktnih situacija. Pored toga, projekat je koristan roditeljima, te lokalnoj zajednici koju ovaj problem pogađa.

Projekat je podržan od strane Instituta za razvoj mladih KULT.



## REDOVNE AKTIVNOSTI ORC I HCA TUZLA

Tokom juna radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za ovu godinu.

## PLANOVI HCA/ORC-A ZA JULI 2016.

- Sprovođenje redovnih aktivnosti kroz Omladinsku mrežu BIH.
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine.
- Nastavak rada na namicanju sredstava za 2016. godinu.
- ZASLUŽENI GODIŠNJI ODMOR.

# AKTIVNOSTI ČLANICA OMLADINSKE MREŽE BiH



Anesa Hidić, član Omladinske mreže, pojedinac

Omladinski krug Kladanj  
E-mail: anesahidic@hotmail.com

## Priznanje za izvrsnost u volonterizmu u lokalnoj zajednici

Pod pokroviteljstvom američke ambasade BiH, u akciji "Izazov BiH" pokrenuto je više od 16.000 mladih ljudi na različitim projektima i akcijama korisnim za lokalnu zajednicu. Dodijeljena su priznanja za pojedince i organizacije. Kao lider i koordinator akcija *Omladinskog kruga Kladanj* i *No Hate LT Kladanj*, naša *Ernada Fatima Avdibegović* je primila priznanja za izvrsnost u volonterizmu u lokalnoj zajednici.

Upućujemo iskrene čestitke na priznanju našoj Ernadi.



## Uspješno završen prvi naučno-istraživački kamp "Konjuh 2016"



Odmah po dolasku 24. maja učesnici su transportovani u novosagrađeni Hotel Miljevica na južnim obroncima Konjuha na području općine Kladanj. Podijeljeni su u ukupno 7 naučno-istraživačkih timova, koji su vođeni pod

mentorstvom timova profesora i asistenata. Istraživale su se teme iz oblasti društvenih, tehničkih, okolinskih, prirodnih, zdravstvenih i sportskih nauka.

U utorak 31. maja 2016. godine uspješno je završen prvi sedmodnevni Naučno-istraživački kamp "Konjuh 2016" koji se realizira u okviru Projekta "Naučno-istraživački kamp za mlade", koga finansira Ambasada SAD u Sarajevu. Osnovni cilj Kampa je podrška međuetničkoj saradnji mladih, a temeljna ideja je da se kroz afirmaciju naučno-istraživačkih aktivnosti u vlastitom opsegu obrazovanja, sa mladim iz drugih krajeva BiH, može postići veoma intenzivna interakcija i ostvariti društvene veze koje će trajati uz saradnju u daljem profesionalnom i poslovnom životu mladih. ■




## NVO Gariwo u okviru svoje akcije "3000 knjiga za biblioteke u BiH" poklonio je Javnoj biblioteci u Kladnju, komplet izbora iz svojih izdanja

Knjige je uručio istaknuti BH reditelj i pisac, *Gradimir Gojer*, poklonivši biblioteci i nekoliko svojih autorskih djela. ■

## Održana promocija knjige „...i ja sam iz Srebrenice“, poznatog Fikreta Hodžića

Dana 03.06.2016. godine održana je promocija knjige „...i ja sam iz Srebrenice“, poznatog *Fikreta Hodžića*, na kojoj je prisustvovao veliki broj građana Kladnja. ■





## OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH  
Tel./Fax: +387 49 211 032  
Email: [svitac@gmail.net](mailto:svitac@gmail.net)  
Web: [www.svitac.org](http://www.svitac.org)  
FB: [www.facebook.com/omladinska.svitac](https://www.facebook.com/omladinska.svitac)

## Dnevne radionice

Omladinska organizacija Svitac je u junu nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Grupa sa mališanima je ovog mjeseca pravila razne dekoracije od kolaž i origami papira, kao što su žabice, ždralovi i puževi, zatim su radili na tehnikama crtanja vodenim bojama, koristeći masne bojice i vosak od svijeća. Šejkeri od malih plastičnih flaša su takođe ovog mjeseca bili na programu za kreativni dio aktivnosti. Jutarnja mala grupa je svakog četvrtka učila i ponavljala brojeve od 1-13 koristeći radne listove za bojenje, a ponavljali su oblike i boje na engleskom jeziku. Grupa je takođe vrijedno vježbala tekst i melodiju pjesme na njemačkom jeziku prilagođenu uzrastu "Das Auto von Luigio". Cilj ovih aktivnosti je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugima i usvoje lijepo ponašanje. U junu je između 20-30 učesnika svaki dan pohađalo jutarnje kreativne radionice.

Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).

Ponedjeljom je na rasporedu engleski jezik, komunikacija, izgovor, te razne igre koje pospješuju učenje stranog jezika u grupi. Grupa je takođe i ovaj mjesec pored gramatičkih zadataka vježbala rečenice u pasivu i radila na temi vrste poslova. Utorkom je kreativno izražavanje - pravljenje raznih dekoracija od vune i mekane žice, zatim pletenje lančića i narukvica i razne tehnik crtanja. Svakog četvrtka grupa je podijeljena u dvije manje i učesnici imaju mogućnost da izaberu sport ili dramu.

Petak je dan za učenje osnova njemačkog jezika kao i za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u junu je bila *Slađana Bašić* uz asistenciju lokalnih i Weltwaerts i EVS međunarodnih volontera *Jonasa Kiesnera* i *Anne Bonitz* iz Njemačke, *Vanesse Brumen* i *Therese Bittman* iz Austrije, *Johna Richardsona* iz SAD-a, te *Monice Reeves*, *Eleonore Peterson*, *Christiana Mennella* i *Trang Pham* iz Velike Britanije. Broj učesnika starije grupe je trenutno između 20 i 25.



## Jezičke radionice

Kursevi engleskog i njemačkog jezika su nastavljani u junu. U školskoj 2015/2016 godini 35 studenata je pohađalo ove kurseve, a bili su podijeljeni u tri grupe (Početni 1, Početni 2 za djecu i odrasle i Srednji 1 za djecu). Svaka grupa je imala dva časa sedmično u trajanju od 90 minuta, a časovi su se održavali u prostorijama Omladinske organizacije Svitac i Omladinskom centru Brčko distrikta. Starost studenata je bila od 8 do 35 godina.

Na kraju mjeseca juna svi studenti su polagali usmene i pismene ispite. Diplome će biti podijeljene početkom mjeseca jula dok će kursevi jezika biti nastavljani u septembru. ■

### „Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-20:00 časova. Zbog velike zainteresovanosti i različitih nivoa poznavanja jezika i gramatike, učesnici su podijeljeni u dvije grupe, naime u grupu za početnike (novi A1) i napredne (A2, B1, B2). Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. U junu su grupe na svim levelima radili na tekstovima prilagođenim njihovom poznavanju njemačkog jezika iz njemačkog magazina za mlade „Vitamin D“, te su čitali razne novinske članke sa temama film i bajke. Grupe A2, B1 i B2 su igrali igru „Tabu“ u kojoj se različiti pojmovi moraju što bolje objasniti na njemačkom jeziku.

Koordinatori projekta su međunarodna volonterka iz Njemačke *Anne Bonitz* i *Vanessa Brumen* iz Austrije. Radionice je u junu pohađalo 20 učesnika (obje grupe). ■

### „I love English“ – radionice komunikacije na engleskom jeziku sa izvornim govornicima

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene za sve koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. U junu su učesnici radionica imali priliku da upoznaju mlade ljude iz Škotske, Australije i SAD-a, koji su bili u posjeti u Brčkom i da saznaju više o različitim akcentima i dijalektima engleskog jezika. Grupa je takođe aktivno radila na vježbama komunikacije.

Koordinator projekta je međunarodna volonterka iz Velike Britanije *Monica Reeves*. Radionice u junu je pohađalo 10 učesnika. ■

### „Parliamo italiano insieme“ – radionice komunikacije na italijanskom jeziku za početnike

Radionice italijanskog jezika se održavaju svakog utorka u prostorijama Omladinskog centra Brčko distrikt od 18:00-19:30 časova. Radionice komunikacije na italijanskom jeziku su namijenjene za uzrast 16+ za sve koji žele naučiti osnove italijanskog jezika i upotrebu svakodnevne komunikacije u dijalozima, te steći nova iskustva i poznanstva. U junu je grupa radila na vježbanju usmene komunikacije u svakodnevnicima i konjugaciji glagola kroz lične zamjenice, te su se upoznavali sa određenim i neodređenim članovima uz imenice.

Koordinator projekta je međunarodna volonterka iz Austrije *Vanessa Brumen*. Radionice je u junu pohađalo 10 učesnika. ■



## Radionice komunikacije na francuskom jeziku za početnike

Radionice francuskog jezika se održavaju svake srijede u prostorijama Omladinskog centra Brčko distrikt od 20:00-21:30 časova. Radionice na francuskom jeziku su namijenjene za uzrast 16+ za sve koji žele naučiti osnove francuskog jezika te steći nova iskustva i poznanstva. Fokus u junu je bio akcentiran na vježbama i dijalozima svakodnevnih komunikacije, te na konjugaciji glagola i njihovoj primjeni na praktičnim zadacima.

Koordinator projekta je u junu bila međunarodna volonterka iz Austrije *Theresa Bittmann*. Radionice je pohađalo 9 učesnika. ■

## Dramske radionice

Projekat „*Dramske radionice*“ za mlade ljude se održava svakog utorka u prostorijama Omladinskog centra Brčko distrikt od 19:30-21:00 časova. Grupa trenutno radi na petoj sceni komedije „*Ne mora uvijek biti Šekspir*“. Svaka radionica počinje sa vježbama zagrijavanja u trajanju od 10 do 20 minuta, a koje su od velike pomoći za opuštanje prije aktuelne realizacije radionice. U toku juna dramska grupa je imala više sastanaka, kako bi diskutovali o individualnom radu na scenama i tekstu. Cilj ovog projekta je da mladi ljudi, koji vole pozorište i glumu usvoje nove vještine, te da steknu nova iskustva i poznanstva.

Koordinator projekta je *Anne Bonitz*, međunarodna volonterka iz Njemačke. Dramske radionice u junu je pohađalo 12 učesnika, uzrasta 16+. ■

## „Freeletics“ – sportske radionice

Sportske radionice „Freeletics“ se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt. Radionice su namijenjene za mlade ljude koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Ovaj mjesec koordinator je posebnu pažnju obratio na kondicione vježbe. Tokom zagrijavanja takođe su se koristile vježbe joge za usvajanje bolje tehnike disanja i pravilnog istezanja mišića. Koordinator projekta je *Miloš Popić*. Asistent na sportskim radionicama je *Jonas Kiesner*, međunarodni volonter iz Njemačke. Radionice je u junu pohađalo 7 učesnika. ■

## Muzičke radionice

U prvoj polovini juna EVS volonterka, *Monica Reeves*, je uz pomoć lokalnih i internacionalnih volontera nastavila sa nizom muzičkih radionica različitog sadržaja. U drugoj polovini juna održan je niz sastanaka sa muzičkim koordinatorom Omladinske organizacije Svitac da bi se odredile smjernice i načini rada u nastupajućem periodu. ■



## Radionice gitare

Učesnici radionice gitare su u junu nastavili su sa redovnim radom

## Radionice sambe

Učesnici ove radionice u junu su dalje razvijali varijacije na zadatu temu iz prethodnog perioda.

## SUMMER ROCK SCHOOL

U sklopu promocije muzičkog projekta „*Summer Rock School*“, čiji je cilj da okupi pedeset mladih muzičara iz cijele Bosne i Hercegovine, mladi band iz Mostara „*Floridus*“ je nakon niza nastupa u nekoliko gradova Bosne i Hercegovine, predstavio svoj autorski rad u Brčkom, u subotu 11.06.2016.

Summer Rock School – Songs That Matter je veliki muzički projekat koji organizira Rock škola Mostar, a koji će okupiti 50 mladih muzičara iz 11 bosanskohercegovačkih gradova.



Kroz Ljetnu rock školu - sedmodnevni muzički kamp koji će se održati u prvoj sedmici augusta na Jahorini - mladi kreativci iz cijele BiH imat će priliku surađivati i stvarati autorska djela. Muzičke radionice i kreativnu podršku obezbjedit će tim predavača Rock škole iz Mostara, a kampu će prisustvovati i poznate ličnosti iz muzičke industrije. Muzički kamp je odlična prilika za uvezivanje vršnjaka sličnih kreativnih interesa, pa će osim dobre svirke biti prilike i za druženje kroz raznovrsne društvene aktivnosti.

Mladi autori će nakon ljetnog kampa imati priliku svoj rad prezentirati kroz koncerte u Sarajevu i Mostaru, dok će u periodu jeseni i zime svoje autorske pjesme snimiti u *DK studiju Rock škole u Mostaru* koje će biti objavljene i na DVD kompilaciji.

Učešće u svim aktivnostima projekta je besplatno za sve učesnike i sve troškove snosi organizator (hotel, hrana, putni troškovi)

Omladinska organizacija Svitac je partner iz Brčkog na ovom muzičkom projektu.

*Za jul se planira nastavak svih redovnih radionica Omladinske organizacije Svitac.*



## Institut za razvoj mladih KULT

Ul. 4. Viteške brigade 34-36 BA, 71210 Ilidža, Sarajevo

E-mail: [kult@mladi.org](mailto:kult@mladi.org)

Tel.: +387 33 778 778; Fax: +387 33 778 779

Web: [www.mladi.org](http://www.mladi.org)

# Čeka se reakcija vlasti na prijedlog izmjene Zakona o PDV-u

Institut za razvoj mladih KULT uputio je Inicijativu za izmjenu Zakona o PDV-u Upravnom odboru Uprave za indirektno oporezivanje.

Riječ je o inicijativi kojom se Institut zalaže za izmjene Zakona o porezu na dodanu vrijednost prema kojim bi:

- obveznici plaćali PDV po naplaćenju umjesto izdatoj fakturi za isporučene robe i pružene usluge, te imali pravo na odbitak ulaznog poreza tek u onom trenutku kada svom dobavljaču plate primljene robe i usluge;
- rok za plaćanje PDV-a bio pomjeren sa desetog na posljednji dan u mjesecu za prethodni mjesec.

Izmjene se odnose na obveznike koji ostvaruju godišnji promet roba i usluga (bez uračunatog PDV-a) do milion maraka.



Inicijativa je pokrenuta početkom marta ove godine, a do sada je podržalo oko 30.000 privrednika okupljenih oko privrednih i obrtničkih komora, te udruženja koja u fokusu svog rada imaju pomoć privredi.

Ovakve izmjene žele Obrtničke komore Srednjobosanskog, Tuzlanskog, Zeničko-dobojskog, Unsko-sanskog kantona, Kantona Posavina, Kantona Sarajevo, Područna privredna komora Banja Luka, Privredna komora Kantona Sarajevo, Gospodarska komora Grada Mostara, Privredna komora Bosansko-podrinjskog kantona Goražde, Privredna komora Tuzlanskog kantona, Privredna komora Unsko-sanskog kantona, Privredna komora Zeničko-dobojskog kantona, Privredna komora FBiH, Udruženje „Kupujmo i koristimo domaće“, Udruženje za unapređenje njemačko-bosanskohercegovačkih privrednih odnosa, Udruženje poslodavaca FBiH i pojedinačni privrednici.

Prema trenutnim zakonskim propisima, poslodavci su dužni izmiriti porezne obaveze, iako nisu naplatili svoja potraživanja. To u konačnici čini brojne poslovne subjekte nelikvidnim, te često dovodi do prestanka poslovanja.

Zagovaranje izmjene Zakona o PDV-u provodi se u okviru inicijative "Poslovni prostor BH", koju vodi Institut za razvoj mladih KULT. Inicijativa je dio Projekta održivosti civilnog društva u Bosni i Hercegovini (CSSP), koji provode Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

## Narandžasti dan/Priče zbog kojih nam se razmišlja

Institut za razvoj mladih KULT 25. juni 2016. godine - Narandžasti dan - Dan borbe protiv nasilja nad ženama i djevojčicama obilježio je uz kratki film "(ON)A?".

Najava filma u martu je prikazana u multipleksu Cinema City, a priča o ženama našeg društva kao hrabrim junakinjama svakodnevnog života sada je zaokružena.

Filmska ekipa ih je snimala u njihovoj svakodnevnicu, a one su ispričale svoju priču

*„Ovaj film snimljen je u znak zahvalnosti svim ženama, kako bi im pokazali da beskrajno cijenimo ono što rade. Narandžasti dan odlučili smo posvetiti ženama koje su svoj život posvetile borbi, koje svojim rukama, riječima i djelima ruše zidove predrasuda i stvaraju bolji život za sebe, one oko njih, nas i onih koji dolaze nakon nas.“* – poručila je Mirela Ajanović iz Instituta za razvoj mladih KULT. Film je dostupan na linku: <http://mladi.org/url/ona>

Narandžasti dan obilježava se svakog 25. u mjesecu, kao dan borbe protiv nasilja nad ženama i djevojčicama, ali je potrebno naglasiti da fizičko nasilje, nije jedini oblik nasilja nad ženama i nije jedini način da se žene u današnjem društvu osjećaju zapostavljeno, izdano, obespravljeno. Prema podacima Agencije za ravnopravnost spolova, 52,8% žena je pretrpjelo neki oblik nasilja, ali iako određeni statistički podaci postoje, o pravim brojkama teško je govoriti.

Institut za razvoj mladih KULT, uz podršku Američke ambasade u Sarajevu, provodi projekt „Narandžasti glasovi“. Jedan od ciljeva projekta je da se svakog 25. u mjesecu obilježi *Narandžasti dan* (Orange day), promovira i lobira za jednakost spolova, obilježava i bori se protiv nasilja nad ženama i djevojčicama, te podiže svijest javnosti i građana o ovoj problematici.

Generalni sekretar UN-a proglasio je svaki 25. u mjesecu *"Narandžastim danom"* (Orange Day), kao dan podsjećanja na važnost prevencije, sprječavanja i sankcionisanja nasilja nad ženama i djevojčicama. ■



## Održan prvi od pet modula obuke službenika/ca za mlade iz FBiH

Institut za razvoj mladih KULT počeo je sa novom obukom službenika/ca za mlade iz FBiH. Održan je prvi od pet modula, a obuku pohađa 22 mladih.

Institut za razvoj mladih KULT provodi programe obuke za službenike/ce za mlade i certificiranje službenika/ca koji se bave radom s mladima u gradskim, općinskim i kantonalnim organima vlasti.

Programom osnovne obuke polaznik/ca se osposobljava za obavljanje poslova stručne osobe u državnoj službi za rad s mladima. Programom obuke polaznik/ca prvenstveno se osposobljava za saradnju i pružanje stručne pomoći mladima pri izradi projekata, osnivanje omladinskih udruženja i promoviranje omladinskog rada, zastupanje interesa i savjetovanje mladih.

Program osnovne obuke za službenika/cu traje 120 radnih sati, raspoređenih po modulima. ■

## Ilidža u znaku mladosti – održana manifestacija „Dan mladih općine Ilidža“

Ispred Obrazovno-razvodnog centra za mlade SPAJALICA na Ilidži, 11. juna 2016. godine održana je 11. manifestacija „Dan mladih općine Ilidža“.

Tokom cjelodnevnog programa za najmlađe posjetitelje organizovane su igre bez granica, kreativne radionice, druženje sa klaunom i face painting, dok su školarci mogli učestvovati u košarkaškom turniru, interaktivnoj radionici o zdravlju mladih „Zaplovimo zajedno“, te posjetiti Sajam nevladinih organizacija.



U okviru manifestacije organizovana je i akcija dobrovoljnog darivanja krvi, prikazan film „The Equalizer“, a u večernjim satima koncert za sve generacije održao je mladi izvođač Edin Talović.

„Jako smo zadovoljni posjetom, ali i sretni jer smo uspjeli organizovati manifestaciju koja je ponudila sadržaje za sve generacije. Dan mladih općine Ilidža već je tradicionalna omladinska manifestacija koju volonteri/ke Instituta za razvoj mladih KULT organizuju jedanaest godina. Lijepo je vidjeti da uloženi trud rezultira zadovoljstvom posjetitelja.“ – poručila je Emina Jusupović, volonterka Instituta za razvoj mladih KULT.

Dan mladih općine Ilidža organizuje Obrazovno-razvodni centar za mlade SPAJALICA čiji je osnivač Institut za razvoj mladih KULT, uz podršku Općine Ilidža. ■



## Asocijacija srednjoškolaca u Bosni i Hercegovini”

Ul. Mula Mustafe Bašeskije 7, 71000 Sarajevo  
Tel/fax: +387 33 205 850  
E-mail: [asubih@yahoo.com](mailto:asubih@yahoo.com)  
Web: [www.asubih.ba](http://www.asubih.ba)

## “Volontiraj i ti “

Fondacija Mozaik u saradnji sa Ambasadom SAD-a u Sarajevu, organizuje sajam „Volontiraj i ti“ na kojem će biti predstavljeni projekti više od 100 nevladinih organizacija iz cijele Bosne i Hercegovine. Cilj sajma je promocija organizacija koje nesebično rade u službi društva i kontinuiranim volonterskim aktivnostima grade otvoreno demokratsko okruženje zasnovano na aktivizmu, solidarnosti, povezanosti i povjerenju. Sajam će se održati u Sarajevu, Mostaru i Banjoj Luci.



Na sajmu u Sarajevu su prisustvovali i predstavnici Asocijacije srednjoškolaca u Bosni i Hercegovini, koji su imali priliku predstaviti aktivnosti koje je odradila asocijacija u proteklom periodu, ali i najveći projekat srednjoškolskih razmjena na području Bosne i Hercegovine, „Friends without Borders 2“, podržan od strane Američke ambasade.

Na sajmovima će posjetioци imati priliku da se na štandovima korisnika/korisnica grantova upoznaju sa rezultatima projekata realizovanih uz pomoć Američke ambasade i USAID-a u BiH, a koji će biti predstavljeni unutar programa Interetnička saradnja, Osnazivanje žena, Demokratska komisija i Izazov. Organizatori se nadaju da će sajam podstaći građane BiH na volonterizam, te da će svojim zalaganjem nesebično raditi na boljitku bh. društva. ■

## Friends without borders - Brčko

U sklopu projekta *“Prijatelji bez granica”* – Friends without borders, u periodu od 3. do 5. juna, srednjoškolci Asocijacije srednjoškolaca u Bosni i Hercegovini Lokalnog tima Brčko ugodili su srednjoškolce iz Lokalnog tima ASuBiH Gornji Vakuf/Uskoplje.



U projektu učestvuje četrnaest gradova iz Bosne i Hercegovine, koji su podjeljeni u parove, a cilj jeste da se sruše predrasude i da se srednjoškolci upoznaju sa svojom državom.

Tokom ova tri dana srednjoškolci iz Brčkog omogućili su svojim kolegama iz Gornjeg Vakufa/Uskoplja da obiđu većinu historijskih spomenika u Brčkom i upoznaju mnoge druge ljepote ovog grada. Posjetili su Vijećnicu, kuću Kučukalića, Islahijet, Bijelu džamiju, Savsku džamiju, crkvu Presvetog srca Isusovog i crkvu Uspenje presvete bogorodice, Hotel „Posavina“, luku Brčko i Ficibajer. Iako je putovanje od 230 kilometara iscrpljujuće, članovi i jednog i drugog lokalnog tima su nastojali da maksimalno iskoriste sva tri dana.

Članovi lokalnog tima ASuBiH Brčko su zadovoljni urađenim projektom, sretni što su stekli nova prijateljstva te se nadaju ponovnom susretu. ■

## Noćni labirint

Projekat „Noćni labirint“ je počeo sa realizacijom nakon seminara koji je organizovala *Fondacija Schuler Helfen Leben*. Na seminaru je nastala ideja da se mladi iz Orašja aktiviraju i pokažu lokalnoj zajednici talentovane i perspektivne srednjoškolce.



Srednjoškolci su 10.06.2016. godine napravili izložbu pjesama, fotografija i crteža u gradskom parku koji im je ustupila Općina za realizaciju aktivnosti. Za sve sugrađane koji su odlučili posjetiti noćnu izložbu, organizovana je tombola, te su učesnici dobili zanimljive nagrade. Srednjoškolci su kao zahvalnicu svim građanima koji su podržali njihov rad poklonili fotografije koje su bile izložene.

Ovo je jedna u nizu aktivnosti koje srednjoškolci iz Orašja spremaju ovo ljeto, te očekujemo još pozitivnih priča kao ova.

## ASuBiH kamp Riječani, 2016.

ASuBiH kamp Riječani je održan u periodu od 20.06.-24.06. u sportsko-rekreativnom centru Riječani. Učesnici su bili srednjoškolci koji dolaze iz deset različitih gradova BiH. Samim tim cilj ovog kampa je povezivanje i druženje srednjoškolaca i rušenje stereotipa i predrasuda bazirano na vjerskim i nacionalnim odnosima. Tokom četiri dana učesnici su imali prilike da prođu kroz razne oblasti neformalnog obrazovanja kao što su prezentacijske vještine, razvoj komunikacije, teambuilding aktivnosti i mnoge druge koje će pomoći koordinadorima i članovima u daljem radu u lokalnim zajednicama. ■





## Omladinsko udruženje Nova vizija

Ul. Opara bb, 72290 Novi Travnik  
Tel./fax: +387 61 309 687, +387 61 593 773  
E-mail: [ounovavizija@gmail.com](mailto:ounovavizija@gmail.com)  
Facebook: <https://www.facebook.com/ounovavizija>

# Ulična kampanja „Podrška žrtvama torture u Novom Travniku“

Omladinsko udruženje Nova vizija u saradnji sa Centrom za socijalni rad Novi Travnik i udruženjem Medica iz Zenice realizovalo je uličnu kampanju povodom 26.06. Međunarodnog dana podrške žrtvama torture.

Međunarodni dan podrške žrtvama torture obilježen je organizovanjem uličnih akcija i podjelom promotivnih materijala u *Zenici, Novom Travniku, Ključu, Mostaru, Bosanskom Grahovu, Livnu i Goraždu*. Promotivni materijal je nastao u okviru projekta „*Osiguranje pristupa pravdi za svjedoke/žrtve kroz jačanje postojećih i uspostavljanje novih mreža podrške svjedocima u Bosni i Hercegovini*“.

Ovo je nastavak uspješne saradnje Nove vizije, centra za Socijalni rad i Medice a slične aktivnosti nastavljamo i u narednom periodu. ■

# Edukativna radionica „Mediji i nevladin sektor“

U prostorijama Omladinskog centra Novi Travnik, OU Nova vizija uspješno je realizovala edukativnu radionicu na temu „Mediji i nevladin sektor“. Kako mladi vide medije, koliko su mediji bitni za razvijanje ideja mladih i na koji način dobiti povjerenje medija samo su dio razgovora na edukativnoj radionici Nove vizije. Nevladin sektor uveliko zavisi od dobre saradnje sa medijima putem kojih javnosti predstavlja svoj rad, pokreće različite kampanje te doprinosi razvoju ideja mladih i njihovih projekata. Mladi su imali priliku da saznaju o vrstama saradnje NVO sektora sa medijima te na koji način medijima ponuditi informacije o radu i dobiti njihovo povjerenje.

Resursi nevladinog sektora često su ograničeni što uveliko otežava mogućnost angažmana medija, zato je jako bitno da nevladina organizacija ima dobru strategiju pristupa medijima i da njeguje prijateljski odnos sa medijima. U narednom periodu mladi će imati priliku da prošire svoja znanja iz oblasti saradnje sa medijima kroz nove radionice.

Naravno kao i uvijek dobre atmosfere nije nedostajalo na radionici Nove vizije a ono što je posebno da na svakoj novoj radionici dobijemo i nove članove/ice koji žele biti dio ekipe vizionara/ki. ■

# Manifestacija „Moj san za moj grad 2“

Vrhunska ekipa, dobra atmosfera i zanimljivi zadaci ispunili su ovaj događaj. Dobrog raspoloženja nije falilo a ekipe Društva, Prirode, Aktivista i Istraživača odlično su obavili zadatak.

Povodom obilježavanja manifestacije „*Dani općine Novi Travnik*“ Omladinsko udruženje Nova vizija danas je organizovalo aktivnost „*Moj san za moj grad 2*“ na izletištu Pavlovica. Tridesetak mladih danas je imalo priliku da u okruženju prirode kreira zabavne i rekreativne programe kroz koje nastoje promovirati svoj grad. Podjeljeni u 4 ekipe: istraživači, aktivisti, društvo i priroda mladi su imali različite zadatke koje su morali obaviti kao tim. Kako bi trebalo po njihovom mišljenju promovirati historijske znamenitosti, urediti grad, promovirati turističke vrijednosti i zaštitu prirode na području općine Novi Travnik bio je samo dio njihovog zadatka. Imali su priliku kroz timski rad razviti svoj plan, kreirati zanimljive sadržaje ali i naučiti o bogatstvima koja ova općina posjeduje. Ovo je ujedno bila prilika da se mladi bolje upoznaju te razmjene svoja iskustva i iznesu probleme s kojima se susreću. ■





## H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Doboje  
Tel./fax: +387 53 226 886  
E-mail: merhamet.doboj@cutuk.net  
FB: www.facebook.com/Merhamet-Doboj

- Aktivisti „Merhameta“ Doboje prisustvovali su javnoj raspravi projekata Opštine Doboje, koja je održana u saradnji sa UNDP.



- Aktivisti „Merhameta“ učestvovali 09.06.2016. godine u sali Skupštine Doboje povodom manifestacije „Građanske mature“.



- U organizaciji „Merhameta“, Zenica a u saradnji sa dobojskim „Merhametom“ organizovan je iftar u Doboju. Veliki doprinos je dao i Adil ef. Rudanović, koji je sa svojim idejama doprinio ugođaju. Zahvaljujemo se direktorici Zeničkog „Merhameta“ i njenim saradnicima za veoma ukusan iftar. Svaka pohvala i za aktiviste „Merhameta“ Doboje Zlatu, Senadu, Semru i druge.



- Predsjednica Avdić Faketa prisustvovala je prezentaciji nacrtu revidirane strategije razvoja grada Doboje.



- Predsjednica „Merhameta“ Faketa Avdić primila zahvalnicu za doprinos uspješnom radu udruženja žena. Dodjeli je prisustvovao i gradonačelnik Doboja, Obren Petrović.



- Aktivisti „Merhameta“ bili su u Jevrejskom kulturnom centru, povodom promocije knjiga jevrejskih autora.



- Izvršena raspodjela pilećeg mesa koju je donirala tvornica „OVAKO“.



- Halida Tubić donirala 300 KM „Merhametu“ Doboju za socijalno ugrožene kategorije.



- Stalne aktivnosti „Merhameta“ Dobj su pomogala za invalidne osobe.



- Donacija „Merhametu“ od firme Violeta.





## PRONI Centar za omladinski razvoj

Ul. Mehmedagića 24, 76100 Brčko distrikt BiH

Tel./Fax: +387 49 217 695

E-mail: pronibrco@teol.net

www.pronibrcko.ba

# Sanjaj glasno! Gradi društvo za mlade iz ruralnih i urbanih sredina



U periodu od 21.05. do 29.05.2016. godine u *Strazburu* (Francuska) održana je studijska sesija pod nazivom „**Dream it loud: Build an inclusive society for rural and urban youth**“, čiji su organizatori bili *Youth Express Network* i *Rural Youth Europe*, u saradnji *Youth Department of the Council of Europe*. Na toj sesiji bio je i naš predstavnik *Harun Šabanović* (rukovodilac Omladinskog kluba Omerbegovača), koji je uzeo aktivno učešće tokom čitave sesije. Na sesiji je bilo 38 učesnika iz 20 zemalja, a glavni cilj sesije je bio promocija uključivanja mladih sa urbanih i ruralnih područja, kao i olakšavanje njihovog pristupa socijalnim pravima na lokalnom nivou. Predstavnik PRONI-ja je predstavio mrežu omladinskih klubova i izradio akcioni plan, kao produkt sesije, koji planira realizovati u svojoj mjesnoj zajednici. Aktivnosti održane na sesiji su bile vezane za ljudska i socijalna prava, liderstvo, timski rad, a bilo je govora o Evropskim institucijama. Učesnici su takođe imali priliku posjetiti neku od organizacija koja se bavi mladima kojima pružaju pomoć u vidu savjetovanja, pomoći pri zapošljavanju i slično. Održano je i interkulturno veče gdje su učesnici predstavljali svoje zemlje uz tradicionalna jela i pića. Učesnici su imali slobodnog vremena da razgledaju sve ljepote Francuskog grada. Sesija je održana u Evropskom omladinskom centru. Svi učesnici su dobili certifikat i društvenu igru o ljudskim i socijalnim pravima. ■

## Podrška radu organizacijama civilnog društva

Hvala United States Embassy to Bosnia and Herzegovina za druženje i podršku radu organizacijama civilnog društva i promociji volonterskog rada u BiH. ■



## Trening jačanja kapaciteta mladih: „Mladi razvijaju regiju Drina-Birač“

U okviru treninga iz oblasti komunikacije, građanskog aktivizma, projektnog menadžmenta i zaštite djece i mladih, ukupno 25 mladih ljudi iz Srebrenice, Bratunca i Vlasenice uspješno je završilo obuku koju su realizovali treneri iz PRONI Centra za omladinski razvoj. Obuka se održala u Srebrenici, u trajanju od 8 dana. Trening se realizovao u okviru projekta „Mladi razvijaju regiju Drina-Birač“, koju implementira omladinska organizacija „Javor“ iz Vlasenice, sa partnerskim organizacijama iz Bratunca i Srebrenice. ■



# SAOPŠTENJA/INFORMACIJE/ DONATORI/POZIVI

## Trening kuće za mlade „LABIRINT“

Da li ste znali da od 2015. godine, tačnije 29. maja otvorena je prva trening kuća za mlade u regiji sjeveroistočne Bosne i Hercegovine. Jedinstvena po svojoj lepezi usluga i karakteristikama prostorija LABIRINT je u 2016. godinu ušao sa 665 zadovoljnih korisnika usluga.

Usluge Trening kuće za mlade „LABIRINT“:

- Korištenje trening sale za aktivno učenje za jednodnevne/višednevne aktivnosti;
- Organizovanje i pripremanje obroka za učesnike aktivnosti;
- Prenosište za učesnike višednevnih edukacija;
- Turistički obilazak grada Tuzle uz turističke vodiče LABIRINT tima;
- DO IT YOURSELF usluge: samostalno dizajniranje i izrada bedževa, samostalno oslikavanje printa na majice pomoću termo prese.

Do sada je 26 različitih omladinskih grupa koristilo usluge trening kuće za mlade sa područja Bosne i Hercegovine i šire. Organizovane su jednodnevne i višednevne edukacije, treninzi, seminari, mirovni i radni kampovi. Ocjene korisnika su odlične, a pored evaluacije najljepši osjećaj je kada se ipak grupe ili individualni korisnici usluga vraćaju u naše prostorije.

Multifunkcionalna trening kuća za mlade LABIRINT je smještena u Simin Hanu u Tuzli, u potkrovlju objekta JU OŠ „Simin Han“ na površini od cca 320m<sup>2</sup>.

Ono sa čime trenutno raspolaže Labirint jesu:

- spavaone (42+ ležaja) u odvojenim sobama za trenere/lidere/odgovorne osobe;
- multimedijalna trening sala, kuhinja i trpezarija sa svim potrebnim elementima;
- 2 toaleta i 2 kupaonice;
- dnevni boravak za odmor;
- parking.

Kako izgledaju naše prostorije pogledajte na:

<https://www.facebook.com/media/set/?set=a.1613427768982773.1073741840.1490370184621866&type=3>

Ukoliko do sada niste imali priliku da dođete u naše prostorije 2016. godina je idelana za vaš dolazak. Mi vas čekamo i želimo da vaše aktivnosti uspješno implementirate u upravu u LABIRINTU.

Kontaktirajte nas za više informacija!

Posjetite naš fun page: <https://www.facebook.com/volimlabirint/>

## USAID poziv: Podrška marginalizovanim ženama u razvoju biznisa

USAID-ov Program podrške marginaliziranim grupama (USAID/PPMG) poziva sve jedinice lokalne samouprave da pošalju prijavu na javni poziv za podršku u implementaciji komponente za Podršku marginaliziranim grupama žena u razvoju biznisa.

Oznaka poziva: 15.02.0-N2.3-3810

Naziv poziva: Podrška marginaliziranim grupama žena u razvoju biznisa

Datum objave poziva: 27.6.2016.

Rok za dostavljanje projektnih prijedloga: **27.7.2016. do 16.00 sati**

Javni poziv je otvoren svim jedinicama lokalne samouprave u Bosni i Hercegovini koje su u mogućnosti osigurati sredstva u jednakom iznosu koji traži od USAID/PPMG-a, s tim da je iznos vlastitog učešća, odnosno iznos koji traži od USAID/PPMG-a najmanje 20.000 KM, a najviše 150.000 KM i primjeniti model podrške koji će biti razvijen u saradnji s USAID/PPMG-om.

Sva pitanja koja se tiču ovog javnog poziva dostavljaju se isključivo putem e-mail adrese:

prijava@ppmg.ba (subject/predmet: 15.02.0-N2.3-3810, Upit).

Puni tekst Javnog poziva kao i svi potrebni obrasci dostupni su na <http://ppmg.ba/ba/grantovi/otvoreni-pozivi>.

Od zainteresiranih jedinica lokalne samouprave se traži da prijavu na Javni poziv najkasnije **do 27.7.2016.** pošalju ili dostave lično na adresu: Ul. 4. viteške brigade 34-36, 71210 Ilidža (na koverti navesti: 15.02.0-N2.3-3810 Prijava na javni poziv – Ne otvarati prije zvaničnog otvaranja prijava).

Prijave koji ne budu dostavljene na navedeni način neće biti uzete u razmatranje.

Izvor: <http://ppmg.ba/ba/vijesti/vijesti-projekta/277-javni-poziv-za-ucesce-jedinica-lokalne-samouprave-u-bih-podrska-marginaliziranim-grupama-zena-u-razvoju-biznisa>

## Poziv za dostavu projektnih prijedloga u sklopu ABD Grant Scheme

Stalna radna grupa za regionalni ruralni razvoj (SWG) u Jugoistočnoj Evropi uz podršku GIZ-a u okviru projekta „Ruralni razvoj kroz integrisano upravljanje šumskim i vodnim resursima“ (LEIWW) objavljuje konkurs za dodelu grantova, osmišljen da podrži male projekte u prekograničnim regionima Drina-Tara, Drina-Sava, Prespa i Šara koji se odnose na stvaranje dobiti kroz promociju održivog korišćenja prirodnih resursa, unapređenje proizvodnih procesa, tehnologije i kvaliteta proizvoda i usluga kroz integrisano upravljanje vodnim i šumskim resursima. Posebna pažnja biće posvećena ekonomskim aktivnostima žena i mladih u prekograničnim oblastima.

Opšti cilj ABD grant sheme u okviru LEIWW programa jeste jačanje ekonomskog razvoja ciljanih prekograničnih regiona kroz promociju sticanja prihoda od održivog korišćenja prirodnih resursa, što će se ostvariti uz podršku preduzetničkih inicijativa usmjerenih na jačanje turističke ponude u regionu i unapređenje proizvodnih lanaca poljoprivrednih, prehrambenih i zanatskih proizvoda, poboljšanje turističkih usluga kroz integrisane projekte koji podstiču saradnju između operatera u okviru tzv. „zelenih“ lanaca vrijednosti.

Poziv za dostavljanje predloga projekata pod nazivom „ABDA grant shema“ otvara se 27. maja 2016, a zatvara **6. jula 2016. u 16:00** po lokalnom vremenu.

Dokumenti za prijavu za dodjelu grantova dostupni su na internet stranici prekograničnog regiona Drina-Sava i Drina – Tara:

- <http://drina-sava.seerural.org/>
- <http://drina-tara.seerural.org>

Pitanja koja se odnose na proces aplikacije za projekte iz prekograničnog regiona Drina-Sava i Drina- Tara mogu se poslati elektronskim putem na adresu:

- [drina-sava@swg-seerural.org](mailto:drina-sava@swg-seerural.org)
- [drina-tara@swg-seerural.org](mailto:drina-tara@swg-seerural.org)

Područje implementacije za Drina – Sava region:

- Bosna i Hercegovina: Bijeljina, Ugljevik, Lopare, Brčko i Donji Žabari;
- Srbija: Sremska Mitrovica, Šid, Bogatić, Loznica i Šabac.

Područje implementacije za Drina – Tara region:

- Srbija: Ljubovija, Bajina Bašta, Prijepolje, Priboj, Čajetina and Užice;
- Crna Gora: Bijelo Polje and Pljevlja;
- Bosna i Hercegovina: Višegrad, Rudo, Goražde, Srebrenica, Bratunac and Milići.

Više informacija: Info o ABD Grant Shemi – final

# Howard G. Buffett fond za novinarke

Rok prijave: 6. juli/srpanj 2016. godine

The International Women Media Foundation (IWMF) poziva novinarke iz čitavog svijeta da se prijave na Howard G. Buffett Fund koji podržava projekte koji uključuju obrazovne mogućnosti, istraživačko novinarstvo i razvoj medijskih inicijativa.

## Ciljevi Fonda su sljedeći:

- Unaprijediti poziciju žena u medijima širom svijeta finansiranjem inovativnih projekata i davanjem jedinstvenih mogućnosti;
- Pomoć novinarkama u izgradnji vještina neophodnih za njihov profesionalni razvoj;
- Poštivanje novinarki koji rade u ekstremnim uslovima kako bi dobile potrebnu sigurnosnu obuku;
- Podrška raznovrsnim projektima;
- Ponuda fleksibilnih iznosa finansiranja i projekata;
- Poziv aplikantima da podnesu ambiciozne ideje;
- Inspirirati originalne saradničke projekte;
- Osigurati mogućnosti za novinarke sa ograničenim pristupom drugim izvorima finansiranja.

## Koristi

Fond je namijenjen za pomoć novinarkama iz cijelog svijeta pružajući aplikantima podršku da:

- Izložiti pitanja o kojima se ne piše mnogo, a globalno su važna;
- Podrška ambicioznim projektima koji dovode u pitanje tradicionalne medijske priče;
- Razvoj područja na bazi stručnosti i jačanja karijere;
- Nastavak kritičnih edukacija osnaživanja i liderstva;
- Pokretanje preduzetničkih projekata izvještavanja ili sticanje vještina da to urade;
- Informacije o finansiranju;
- IWFM će godišnje ukupno dati 230.000 dolara grantova za podršku novinarkama u njihovim projektima i poduhvatima.

## Kriterij kvalificiranosti

- Mogu se prijaviti novinarke iz bilo kojeg mjesta u svijetu.
- Novinarstvo mora biti primarna profesija podnositeljice aplikacije.
- Kandidatkinje moraju imati tri ili više godina profesionalnog novinarskog iskustva.
- Mogu aplicirati i novinarski timovi, međutim aplikacija mora biti od novinarke i njen tim mora imati najmanje 50% žena.
- Posebna pažnja će se posvetiti slobodnim novinarkama.
- Kako aplicirati
- Aplikacije se predaju online putem.

Novi krug prijava se otvara početkom juna/lipnja.

Za više informacija pogledajte Howard G. Buffett Fund.

# Robert Bosch Stiftung: finansiranje za projekte na područjima izgradnje mira i transformacije sukoba

Broj sukoba unutar zemalja, kao i sukoba među nacijama je i dalje u porastu u posljednjih nekoliko godina. Ovaj trend prati veći broj lokalnih, regionalnih i međunarodnih inicijativa transformacije sukoba. Stoga postoji velika potreba za ciljanom i pravovremenom podrškom.

Naš cilj je podržati projekte koji služe facilitiranju transformacije sukoba u sukobu (i prošlih sukoba) društava u različitim regijama. Kao rezultat toga su podržani projekti koji se fokusiraju na suočavanje sa prošlosti, uključujući pitanja tranzicijske pravde, posredovanja, ljudska i manjinska prava, jedinstvenu ulogu digitalnih tehnologija u sukobima (i postkonfliktnim društvima), načine izvještavanja o sukobima, i ulogu religije u sukobima.

Posebno smo voljni podržati projekte koji omogućuju prijenos dobre prakse iz jedne regije ili ciljanog u područja u drugo.

Tokom čitave godine se primaju prijave za finansiranje projekata do cca 25.000 eura.

Link za više informacija: <http://www.bosch-stiftung.de/content/language2/html/61514.asp>

## Poziv za mlade književne kritičare

U povodu Prvog internacionalnog festivala književnosti Bookstan koji se održava od 25. do 28. jula 2016. godine, izdavačka kuća Buybook u saradnji sa nastavnicima i saradnicima Filozofskog fakulteta u Sarajevu, te Akademijom likovnih umjetnosti priređuje edukativno-kritički program iz oblasti pisanja književno-umjetničke kritike koji će trajati od 22. do 28.07.2016. godine.

Zadaci za odabrane kadidate bit će podijeljeni u tri segmenta:

- **Prva faza** je pisanje teksta u formi književno-kritičke minijature koji će trebati realizirati i dostaviti do 17. jula, a zadatak će biti naveden u pozivnom pismu.
- **Druga faza** podrazumijevati će zadatke koji se tiču novinarskog praćenja događaja Festivala; navedeni tekstovi bit će objavljeni na društvenim medijima, web stranici festivala i izdanjima medijskih kuća.
- **Treća faza** je pohađanje predavanja i radionica sa uglednim predavačima u vrijeme trajanja programa.

Poziv je namijenjen studentima i književno-umjetničkim kritičarima koji žive ili studiraju u Bosni i Hercegovini. Na poziv se mogu prijaviti mladi u dobi od 18 do 30 godina koji aktivno govore engleski jezik.

Stručni žiri će odabrati 20 polaznika programa koji će realizirati zadatke za koje će biti dodijeljena priznanja i nagrade. Za vrijeme festivala, Buybook će polaznicima koji ne dolaze iz Sarajeva obezbijediti smještaj u hostelu, hranu, te će refundirati troškove autobuske karte.

Svi odabrani učesnici su obavezni da prisustvuju cijelom programu u trajanju od 22. do 28.07.2016. godine.

Prijave se šalju na e-mail adresu [radionica@buybook.ba](mailto:radionica@buybook.ba) do **07.07.2016.**

E-mail – prijava za sudjelovanje treba da sadrži biografiju i dva rada iz oblasti književno-umjetničke kritike (esej, stručni ili naučni rad).

Nepotpune prijave neće biti razmatrane. Zvanične potvrde učešća ćemo najkasnije do 11.07.2016. godine poslati primljenim kandidatima, uz detaljan program rada i potrebne logističke informacije.



### Dragi prijatelji,

*Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.*

*Rok za dostavljanje informacija za svako naredno izdanje je 30-ti u mjesecu.*

*Adrese za slanje vaših informacija za mjesečni bilten:*  
**Omladinski resursni centar Tuzla**  
**Hadži Bakirbega Tuzlića 1**  
**75000 Tuzla**  
**tel/fax: 035 258 077**  
**e-mail: [orctuzla@bih.net.ba](mailto:orctuzla@bih.net.ba)**  
**[hcatuzla@bih.net.ba](mailto:hcatuzla@bih.net.ba)**

*Mjesečni bilten uređuje*  
**Omladinski resursni centar -**  
**ORC Tuzla**

*WEB stranica Mreže:*  
**[www.omladina-bih.net](http://www.omladina-bih.net)**

*Mejling lista Mreže:*  
**[posta@omladina-bih.net](mailto:posta@omladina-bih.net)**

*Webmaster:*  
**[emir.delalic@gmail.com](mailto:emir.delalic@gmail.com)**